

LAS FOLLAS DE LOS ARBOLS *

POR VEREMUNDO MENDEZ COARASA †

*Ya ve venindo lo frio,
que traye l'añada nueva,
en esta Sanmiguelada,
que'nta San Martín nos leva;
arrastráu y traidoracho,
por "Patracó" 'nt'aquí plega
y poquet a poquet puya,
móns ent'alto, hasta la selva.
Lo que troba, por do pasa,
sin sangre y cheláu, lo dexa,
féndoli perder colós,
a toda planta, que'n tierra,
vive, dreita, allí, su vida
hasta que ruta se queda,
sin que dinguna se quexe,
porque lo morir espera,
pero pa morir se visten,
que da gloria lo vièrlas,
las follas de los arbóls
y de las matas espesas,
con que son pobláus los móns,
cuasi toda la val nuestra.*

* Un año antes de morir, nos envió el gran poeta cheso varios poemas para su publicación en ARGENSOLA; su muerte interrumpió ésta. Ahora publicamos este poema y en un próximo número el último que nos envió.

Allora, plegáus los frios,
 empecipian a perderlas,
 ixas colós, tan polidas,
 con que antis vestidas yeran,
 pero fijarvos, que todas,
 lo mismo rastro no dexan,
 ni amuestran iguals colós,
 pa tornar, de verde a seca.
 Bellas los verdes apuran
 y hasta con verde, se secan;
 otras se ven fendo royas
 y royas cayen ta tierra;
 no'n falta qui, de amarillo,
 cuando cayen, ixe levan;
 bi-n-há son ensangrentadas;
 muitas han color de tierra;
 a ormino salen azuls
 y tamién se'n veye negras;
 xarramatas de motiadas,
 i-n-há por toda la selva
 y como quiera se siga,
 que no por igual se secan,
 según de qué árbóls u plantas,
 sigan ixas follas muertas.
 Bá días, que si las veyes,
 cuando a machurrirse plegan,
 prexinas que ye otro tiempo,
 de verano u primavera
 y que, lo ramo San Chuán,
 que políus colós amuestra,
 fendo circos en lo cielo,
 cuando s'acaba la plevia,
 las ha pintáu con los suyos,
 pa que asi, pintadas, mueran,
 dicindo adiós a la vida,
 presumindo y bién contentas.

*Ye mui grán ixa visión,
si metes l'alma pa vierla,
cuando vestidas las follas,
de colós variáus, a ucenas,
cantan l'adiós a la vida,
en los móns de la Val nuestra,
antis que muertas de raso,
sofla cierzo y la se leva...
cuando ya, de pazaricos,
ni rastro 'n los móns bi-n-heba
y en las puntas mas altizas,
blanquían las niéus, que plegan.
Solo buracos y pinos
y pocos arbóls mas quedan
aquí sin perder las follas;
los colós, si, pierden fuerza;
se corrucan, se machurren,
pero las follas se i-quedan.
Temblan de miedo y de frio,
viendo a muitas follas muertas,
chunto a troncos dreitos y altos,
que las son tenidas a ellas,
que luego la niéu las tapa
y ni rastro'n veyes secas,
cuando ha pasáu la iviernada
y ha tornáu la primavera,
que adezaga de los brotes,
han salíu las follas nuevas,
en los arbóls y en las matas,
que, espulláus, lo invierno apechan.*

*Tornan los colós allora,
en los arbóls que las heban,
a las follas que viëron,
las que cayeron ta tierra,
de otros en que, cada añada,
cumplindo sabia sentencia,*

*han que pasar, sin de follas,
los inviernos que han en cuenta,
que lis ha a durar la vida,
hasta que, la estral, los dexa.
Sinfonías de colós,
las follas, morindo, amuestran
y soflando fuerte u floxo,
l'aire, secas, las avienta,
cantando políus romances,
a las pobres follas muertas,
que escuitan las niéus cheladas
y, amorosas, las replegan.*